

共同經課-1 使徒行傳十章三十四節～四十三節

34 彼得開嘴，講，Taⁿ 我真正知上帝無用外貌取人；35 獨獨 tī tak 邦國見有敬畏伊來行義^e人，hō伊歡喜接納。36 上帝所寄 hō以色列 kiaⁿ 孫^e話，tùi 耶穌基督來傳和平^e福音，(伊是萬有^e主)，37 chit-ê 消息 lín 知是 tī 約翰所傳^e洗禮以後，tùi 加利利起到遍猶太；38 就是拿撒勒人耶穌，上帝有怎樣用聖神 kap 才能抹伊；伊就四界行做好事，醫好見若魔鬼所壓制^e；因為上帝 kap 伊 tī-teh。39 見若伊 tī 猶太人^e地方 kap 耶路撒冷所行^e，阮做干證；人就吊伊 tī 柴裡，來害死伊。40 到第三日，上帝 hō伊 koh 活，續出現，41 m̄是 hō眾百姓看，是 hō上帝事先所揀選為 tiòh 伊做干證^e人看，就是阮 chiah-ê，tī 伊 tùi 死人中 koh 活^e了後 kap 伊 saⁿ-kap lim 食^e人。42 伊 koh 命令阮傳 hō百姓，干證 chit-ê 是上帝所立定做活人死人^e審判司。43 眾先知亦為 tiòh 伊做干證，就是凡若信伊^e人，tùi 伊^e名得 tiòh 罪赦。

共同經課-2 詩篇一一八篇一節～二節、十四節～二十四節

1 Lín tiòh 感謝耶和華，因為伊是好；因為伊^e慈愛永遠 tī-teh。2 願以色列講，伊^e慈愛永遠 tī-teh。14 耶和華是我^e氣力，是我^e詩歌；伊亦成做拯救我^e。15 Tī 義人^e布棚內有歡喜^e聲，拯救^e聲；耶和華^e chiàⁿ 手施出大權能。16 耶和華^e chiàⁿ 手 kiáh 高；耶和華^e chiàⁿ 手施出大權能。17 我 boē 致到死，iáu 能活 teh；續 beh 報揚耶和華^e所做。18 耶和華 bat 嚴嚴警戒我；總是未有將我交 tī 死無。19 Tiòh kā 我開義^e門；我 beh 入去，感謝耶和華。20 這是耶和華^e門，義^e人 beh 入去。21 我 beh 感謝你，因為你已經應我；Koh 成做拯救我^e。22 師傅所棄 sak ê 石，已經成做厝角頭^e石。23 這是耶和華所做^e，咱^e目矚看伊做奇怪。24 這是耶和華所定 tiòh ê 日；咱 tī chit 日^e中間 beh 歡喜快樂。

共同經課-3 哥林多前書十五章一節～十一節

1 兄弟 ah，我 hō lín 知我前所傳 hō lín ê 福音，lín 所承受，所 oá 靠來 khiá 在^e；2 lín 若執守我所傳 hō lín 福音^e道理，也 m̄是空空信，就 tùi chit-ê 得救。3 因為我所受來傳 hō lín ê，第一就是基督為 tiòh 咱^e罪死，照聖經所記載；4 koh 有埋葬；第三日 koh 活，也照聖經所記載；5 有出現 hō 磯法看見；koh 出現 hō 十二個使徒看見；6 koh 一 pái 出現 hō 五百 goā ê 兄弟同時看見，其中大半 iáu tī-teh，但是有^e已經暈去。7 Koh 一 pái 出現 hō 雅各看見；又 koh 一 pái 出現 hō lóng 總^e使徒看見；8 siōng 路尾也出現 hō 我看見，我是親像未夠月來生^e。9 因為我是使徒^e至微細^e，boē 堪得稱做使徒，因為我 bat khún-tiòk 上帝^e教會。10 總是我 taⁿ 成做 chit 等號^e人，是 tùi 上帝^e恩 chiah 有；koh 伊所賞賜我^e恩 m̄是空空；但是我比 in 眾人 khah tiòh 磨；其實 m̄是我，是上帝^e恩 kap 我 tī-teh ê。11 Án-ni 不論是我^e是 in，阮 mī án-ni 傳，lín mī án-ni 信。

共同經課-4 馬可福音十六章一節～八節

1 安歇日已經過身，抹大拉 ê 馬利亞 kap 雅各 ê 老母馬利亞，kap Sat-lô-bí，有買香料，beh 來抹耶穌。2 七日頭一日，真早，日 tú-á 出，in 到墓；3 saⁿ-kap 講，Chī-chūi-á beh 替咱 kō hit 塊石離開墓門 ah？4 Kiáh 目就看見 hit 塊石已經 kō 開；因為是真大塊。5 入墓看見一個少年人坐 tī chiàⁿ-pêng，穿白衫；就 gông-ngiáh。6 少年人 kā in 講，M̄免 gông-ngiáh，lín 是 chhē 釘十字架 ê 拿撒勒人耶穌。伊已經 koh 活，無 tī chia；你看，伊埋葬 ê 所在。7 Taⁿ tiòh 去，kā 伊 ê 學生 kap 彼得講，伊事先 lín 去加利利；lín tī hia beh 看見伊，照伊所 kā lín 講 ê。8 Chiah-ê 婦人人出去離開墓，就走，因為 ngiáuh-ngiáuh-chhoah gông-ngiáh；也無 kā 人講甚麼，因為 in 真驚。